

四庫全書

集部

欽定四庫全書

集部
御定歷代賦彙卷
七十
七十一

詳校官檢討臣劉炘

主事銜臣徐以坤覆勘

總校官編修臣王燕緒

校對官中書臣李斯咏

謄錄監生臣沈智

欽定四庫全書

御定歷代賦彙卷七十

農桑

勸農賦

晉束皙

惟百里之置吏各區別而異曹考治民之賤職美莫當
乎勸農專一里之權擅百家之勢及至青幡禁乎游惰
田賦度乎頃畝與奪在己良薄瞻口受饒在於肥腠得
力在於美酒若場功畢租輸至錄社長名閭帥條牒所

領注列名諱則豚雞爭下壺榼橫至遂乃定一以為十
拘五以為二蓋由熟啖紆其腹而杜康啗其胃

觀農賦

唐闕名

歲起於東丁壯就功則知富民必資於廩實強國亦在
於年豐是時也杏花毓樹蒲葉抽叢繞出鳳城疲道路
之攸往迴瞻鵝野知耕鑿之斯崇美夫原隰底績溝塍
刻鏤耒耜交橫煙雲輻湊人沮溺而為伴水鄭白以分
溜一稊二米禾同北里之禾苗盛草稀豆異南山之豆

觀夫田畯至喜室家相歡揮鉏去莠築堰澆蘭野餉曉
持於斜徑畚鍤暮荷於層巒憐近山之樹密悅臨流之
地寬葵腰鎌而乍采黍策杖而時看且人生在勤勤則
不匱欲抑末以敦本在用天而分地思文后稷濟時敷
播植之功惟彼陶唐申命掌嵎夷之事八政之中食居
一四人之裏農為二倬彼甫田習無不利故土爰稼穡
含靈是資歲稔則家知禮讓食足則國贊雍熙無辭艱
難服先疇之畎畝皆當儲峙救黎人之阻饑九年殷憂

於堯日萬箱發詠於周詩迹忝門人得承規於孔父心
將請學恐貽責於樊遲

稼如雲賦

以農夫望歲歡
以滌場為韻

唐張仲素

天何言哉歲云秋矣臨甫田而一望見多稼之具美亘
平野而雲鬱覆高原而黛起九土用康兆人賴止豈非
協風中律農祥順軌土牛作候而不憊銅雀載鳴而有
以徒觀其千畝既良萬頃式臧興有渰而混色霑霖霖
以齊芳雜非煙與非霧乍漠漠以蒼蒼孰克辨乎帝力

咸自嘉於我疆御田祖之神時聞擊鼓樂農夫之慶且
見築場察彼近郊知夫四裔何山苗之能植伊隰桑之
尚蔽豐滋漫若用表於播時悅茂油然寧憂於晚歲矧
乃華實云就堅好不渝豈茨梁之足喻若薈蔚之將敷
知艱難垂戒於往哲務蔗蓰在勸於鄙夫爰協古公之
政式弘管氏之虞至夫實穎蓁蓁厥田上上膏陰潤以
蕃庶蠱朝濟之異狀邱陵共秀且聞東皙之詩黍稷盈
疇更鬱仲宣之望懿夫白露凝冷清風戒寒是刈是穫

式燕且歡諒遺滯之足利思京坻而可觀蓋由我君勤
儉所彰純嘏屢錫運璿衡之冥數煥玉燭於昌厯分地
而嘉穀用登報天而犧牛在滌下臣覩而作頌敢歎美
於成績重曰望如雲兮我稼既同除其穢兮田具是功
既庭又碩兮將表歲終喜有秋兮可以勞農

多稼如雲賦

以徧野連山如
雲委積為韻

唐王 棨

暇日間望秋田遠分彼盈疇之多稼乃極目以如雲墾
隴畝以青連乍疑散漫疊菑畲而綠合長帶氤氲豈不

以膏澤調勻薰風順適致南畝以豐稔若西郊之重積
芒既抽而散紫花已飛而帶白幾多嘉穗高低稍類於
垂天無限芳田遠近有同於抱石傍觀夫曼衍平川綿
延大田接層阜而如從岫出極低空而若與天連農夫
既愜於望歲野老咸欣其有年滿原隰以蒼蒼遙迷曉
霧被溝塍而或或常混晴煙有地皆勻無川不徧何秋
成之色可羨疑暮斂之容斯見似能扶日帝堯之日上
臨如欲隨風后稷之風傍扇故得邨落心泰田家景閒

競秀發於郊坰之外同垂陰於疆理之間生因桀溺之
耕寧由觸石起自樊遲之學豈肯思山匝高下以鮮若
纂東西而波委苟含穎以斯在諒無心而若此不稂不
莠同玉葉以紛敷彌阜彌岡異竒峰之灑迤是知黍翼
翼以相雜麥芄芄而不如誠匪握苗之後猶疑荷鍤之
初若昧躬親奚百畝以斯盛將其刈穫獲千箱而有餘
且君之寶以穀而為人之寶惟食是假觀稼盛於五地
若雲凝乎四野若不屬此以歌謠終慮取嗤於樵者

嘉禾合穗賦

有序

唐藩炎

景龍二年秋八月屬縣長子有嘉禾合穗瑞不虛月候
其偉而乃賦曰

天祚明德兮降之嘉生按彼靈篇兮莫之與京脈震土
膏且分苗於南畝駟臨天漢爰合穗以西成當元后之
歷試表休徵於太平不莠不稂實堅實阜引薰風於和
氣承湛露於蒼昊生非百里驗管仲之虛詞出異崑山
自我皇之所實在瑞圖之右為曠代之祥唐叔得之而

合穎周成得之以充箱雙米一稔稱之表異孤莖六穗
頌以非常今也尤盛居然允臧轉風而屢騰佳氣就日
而交見祥光獨天不生託厚載於富媪非聖不感效元
符於我皇我皇得之熾而昌風之起兮雲之揚嘉禾之
瑞未可量天子億載臨萬方

嘉禾合穎賦

唐張真祥

南山之下兮無人之境力穡此中兮均夫躁靜勞則不
憚既寒耕而熱耘慶有所歸忽異畝而同穎莖駢惜芄

芄之色秀合垂萁萁之影此焉觀瑞亦祇以異比於木
乃連理之祥在於人蓋同心之義稭已聞於二米莖乃
殊於九穗豈非德之能及實聖朝之所致爰考休徵豐
年是憑麥兩岐而能匹茅三春而徒稱固神倉之可貯
期郊廟之以升欲薦堯階且聞稭稭之獲將登神膳遂
入煇煇之烝天道玄默瑞以表德豈無沃土而光於我
家豈無異方而祚此王國不有嘉生孰謂賓榮友朋之
心因取興於連茹兄弟之樂遂作戒於分荆佇聞唐叔

之獻頌我后之升平

甸人獻嘉禾賦

唐趙蕃

聖上崇國本致時康動玄象之昭鑒產嘉禾而應祥甸人於是具畚鍤修封疆啓芳穎於修畛薦靈姿於我皇懿夫挺拔自分連拳相接始穰穰而齊實終矯矯而異葉殊其本均二氣以發生同乎心表一德之和協不然者寧擢秀於墳衍載具美於圖牒徵其瑞質稽彼大同見芬敷而共貫信榮結以交通則知符乎帝道發自天

功合穗之珍方將效祉於今日異畝之美豈獨標奇於
古風於是野老歡心田夫盡力宛移根於沃壤之際俄
發耀於丹墀之側祥煙近拂乍疑連理之形喜氣傍臨
更辨合歡之色彌彰執契之道載助惟馨之德爾其天
鑒非遠神珍是呈始莒亭而間出終天矯而曲成豈比
躬稼之時盡化晉君之草挺生之歲克符漢帝之名向
令質委離披孤生莽尊安得臨玉砌邇龍袞設種耜之
萌芽為理化之根本是知六府惟序萬邦式孚茅三春

而非偶獸共觝而自殊未若耀青芳於近甸垂嘉貺於
靈圖况復聖慮彌深皇猷思永梯山航海未足契其休
光菲食卑宮將欲示其豐省斯所謂騰茂實於厚地故
薦穗於重穎

嘉禾賦

明 沈 鯉

惟帝藉之千畝接宸極之宮牆翕垓埏之瑞煒穆元辰
於孟陽萃坤靈而厚載孕扶輿以發祥錯龍鱗於原隰
布鏤刻於滕疆沁玉河之沃潤浥金露之膏瀼拓周臺

之靈囿陋漢苑之朱堂感華胥於禁寓闢融澤於扶桑
禱農祥於地后震瘳憤於天房蓋聖朝之所以先稼穡
備蒸嘗展一人之孝思而闢社稷之靈長者也粵惟我
皇踐祚闢坤握乾仁宣義濺聖思廣淵契七月之精蘊
領無逸之直詮振天明而有德躬豐服於明禋履桑林
而簡啓望三素以祈年當東作之平秩舉大典於藉田
親秉耒以三推御慈輶於青氊命后稷以播穀簡伯禹
以疏泉班保介而終畝勞百辟於肆筵布陽和於九有

暢聖澤於八埏爾乃精忱上達協氣旁通瑞祉駢臻靈
貺雲從沴氛神禦寶露時融宜暑宜寒十雨五風將及
我私先急我公我黍翼翼我稷芄芄既庭且碩實大以
豐乃有嘉禾秀擢蒙茸或一本而多岐或數穗而同莖
引瑤風以幻質濯玉瀝而凝精陸離離以綴蕾韡采采
以含英溶丹椹之芳潔燦瓊蕊之晶熒秉五七之恒德
挺九穗之奇禎纍連珠而合穎一金玉而本生霈休符
於甘雨銜滋液於璇星毓祥柯以五變耀泰運於九莖

天施雨而匪瑞日淪地而有徵譬禮義之多富獵龍鳳
之異名軼幽谷之蘭茝掩玄圃之松苓彼紫麻綠苴豈
嘉禾之與埒而碧麥靈苗詎並蔚而爭榮若夫粟雨炎
帝瑞發軒轅陶虞異稱魯史書年成周合穰唐叔命篇
字成雨於倉頡穎頌著於鄭玄卷野產之而名邑赤烏
因之以改元外此而朱萸歷於堯陞紫蔥茁於太原秀
騰濟陰之境旅生建武之年稻孫揚蕤於金斗祥麟集
食於武川敬仲乃啓封禪之所致汾陽極稱天瑞之可

傳此皆帝不貴乎金玉而寶夫衣食之源故其政必調
於函夏而時省斂於秋田之所致也乃有連叢合隴七
穗五歧三苗四熟珍綺紛披或北里之稱盛或玄山之
讓奇不周或呈其異種帝庭或獻自外夷或光照九阿
之謠或香聞五里之滋是以繁瓌移稱於前代而昌符
踵應於來茲孰若聖世之休禎炳靈淑於神祇實皇衷
之淵塞特示象於疇舊既登八極於安和仍濟萬國於
咸熙允阜澤之潛通羌弘化之寵綏於是田畯至喜穡

夫載忻僉曰異哉世所稀聞薄言采之以獻吾君於惟
皇上勲華淑軌方且秉冲自下遜美弗居謂嘉穀之呈
象豈涼德之克符實先聖之顯烈膺上帝之瑤圖也於
是降明詔蠲吉辰徵太師之九奏舉宗伯之十倫飭豆
登而並薦毳樽俎以俱陳信曾孫之有道企皇祖之居
歆於是大禮告成億兆歡欣東漸海隅西暨沙壩具瞻
上瑞雷動風傳凡在廷之臣工咸稽首以颺言謂聖王
治天下以孝而五穀為王政之先茲者聖德廣運格於

重玄一人有慶兆民賴焉將使至治刑于萬國嘉祥載
於普天皇風皞皞王道平平端冕垂旒四海晏然穆穆
天子壽考萬年

嘉禾賦

明許國

勾吳文學躡屨之燕會天子藻潤太平四方瑞應日奏
闕下既聞有獻嘉禾者羣公畢賀迺盱衡濯慮而往觀
之邁徇華子與好古先生辨論金門之左揖而聽其語
徇華子曰吾聞太和之氣醞釀堪輿蓄極而發奇珍乃

攄祥風之所披拂膏露之所沾濡神不能闡其粹天不
能表其符沕滴逢涌溢為嘉禾蓋冥搜於玉策茲快覲
於皇都夫其陸海廣輪神膏沃衍龍首通渠魚鱗豐畹
蔚封畛兮縱橫倬阡陌兮宛轉三推既倡兮九扈作勞
黃茂聿滋兮玄功斯顯則有玉山異種北里仙英濟陽
九穗崑崙五尋挹光華於日月凝沆瀣於太清卿雲照
爛以垂覆景星煒煜而流晶毓非常之元化挺秀質於
金莖爾乃穎擢丹霞穎抱明月豐枝萃萼瑋幹芳潔或

珠聯於異畝或琪映於同暉或兩儀分於混沌或五氣散於輳輳或參乎乾畫之精或象乎洛疇之列其生也后稷降靈厲山遺烈種美璧於藍田萃商金於清樾其用也含哺萬國芬芳九閭頤天顏於五位肇王基於七月猗震中之上瑞羌閱世而昭揭昔蒼姬之受命兮爰抽祕於唐叔逮白水之真人兮值虹流而載育曰悠悠其歷劫兮嗟未間乎芳躅匪至寶之不可恒兮何寂寥於圖籙聖皇建極兮超赫胥而軼大庭黃輿獻琛兮嘉

禾乃登邇歲糴兮千畝遠璀璨兮八紘由顧命越於今
茲兮果何方兮弗獲亦何歲兮弗生保介紛綸而奏御
奇祥雜運於汗青蓋千萬年之希睹而鴻濛剖判所未
有之庥禎也謂宜陟岱岳告成功勒蒼崖樹穹窿跨冀
莢於堯除掩蟠桃於漢宮何為乎僅升太廟之几聊陳
尚膳之饗茂洪朗而弗耀抑崇峻以謙冲意者聖人之
盛德兮慮非所以章明賜而承昊穹於是好古先生拂
然色厲正襟諤諤而復之曰異乎子言所謂見一斑之

文豹蔽豐蔀而測星躔者也吾聞之柔桑暮拱殷道以
興芝房協律漢業幾傾蒼麟駟於羯乘黃龍炫於吳京
謂變者未必為咎疑祥者未必為禎其休其否此焉足
憑嗟大鈞之寥闊兮二五交蒸神奇臭腐兮靡說弗呈
勘一抹一擠之榮亦造化之偶然兮夫何與於朝廷是
故明王馭世不貴異物有兢兢而思慎曷顛顛於黼黻
稽六府之重輕察三才之秒忽故以豐年為寶民食為
天游神稼穡雅意甫田躬黛耜御紺轅廛穡清之宵旰

祇求裕乎元元如其耕耘不擾疆理盡力多黍多稌時
萬時億百室開兮婦子寧百禮洽兮神人懌即大化之
神明知協氣之融液雖無嘉禾奚損至德如其疆理蕪
溝遂廢鳴條不時濯枝愆序田畯失其咨茹亞旅闕其
樹藝黔黎艱食風教刊敝雖有嘉禾奚益世故今天子
遠覽陶鈞之上庶幾歸禾之旨視厥方貢讓而弗處有
事寢園薦馨而已蓋俯徇乎百辟非則倣乎夸詡子大
夫不究本原矜奇說異殊謬乎春秋之義語未卒勾吳

文學攝齊而進曰長卿有言楚既失矣齊亦未為得也
且皇天樹后以長世豈漠然其無情有錫羨以純佑或
降威以宣懲伊災祥之大致固在昔其明徵然而天道
遠人道邇驗善惡之幾先視后德何如耳有禾芊芊明
盛之年飛紫芒於堯陌垂金粟於舜田氣緣感而後應
治有開而必先以此為瑞瑞何疑焉若夫帝澤未流嘉
禾聿穰搖盲飈以扶疎潤怪雨而夢蘄雖併穗之可觀
實陰陽之多戾出非其時是奚足貴名之曰妖又豈非

類故夫麟一也遊郊者軒以之光西狩者周以之亡鳳
一也岐山鳴而德茂潁川集而道荒彼四靈其畢爾豈
茲禾之比方蓋以瑞稱之兮瑞未可必以妖視之兮妖
亦非常亮神霄之有意非臧否其茫茫維觀物而考德
兮乃天人之並彰噫嘻為妖為瑞以昏以聖則大聖之
握符必降康之綦盛方今巢燧當陽夔龍布令步玉斗
懸金鏡匹夫軫於宸衷三農重於八政春臺若登寒暑
皆應是以震聲日景雪煜九玄貢華喬岳輸英大川極

薰蒸而旁魄乃茁暢於天田所謂以和召和兮洵神理
之自然豈比夫赤烏與泰始空詫說於民間昔我高皇
帝之紹天也虎旅戢而化成龍門獻其嘉穗肆賁天章
用歌敬畏不侈大以自矜爰貽謀而錫類誠天寵其德
而靈承其瑞於今觀之維上克配而先生不考於此一
以為希覩一以為偶然弗原天而盡人得無立言之少
偏伊欲照金簡重瑤編表熙朝之鴻鑠邁周烈於千年
務昭明乎聖德乃論治之真詮文學語既從容而却先

生斂容唯唯諾諾顧謂徇華子曰此嘉禾之讜議也足
勸賢而警虐庶幾風人用備著作

嘉禾賦

明
陳經邦

猗帝苑之天田紛布綺而錯繡德馨鬱而升聞發嘉祥
乎黃茂原夫禾之始藝兮爰開藉於中春皇既祈於天
宗兮厥又雩乎靈辰沃壤墳腴而砥平兮清流映帶而
還汜服蔥轄而秉黛耜兮勤萬乘而躬履於是油雲滄
布膏雨沛施后稷播種勾龍敷菑醴泉沃其靈根融臯

鬯其神機飴露滋其菁華和風披其緇枝有相之道日
至而齊朱火既盈穰金斯屆蓂莢摧擢與與旆旆阿那
兮垂芒穎粟兮觀穗全千畝其鱗集兮九扈揚眉而告
祥何莖連而穎合兮昭盛德如吾皇拂雲罕而晻靄兮
映瓊鉞而入蕊棼總總其盈疇兮班陸離而充籞兩岐
挺而交秀兮三穗跂而呈珍厥本盈百而餘三兮奇偶
錯以相成夫景星麗天未若茲禾之繁碩而被阡慶雲
彌宇未若茲禾之翦翳而垂庾神芝朱草未若瓊脂玉

粒可餐而飽寶鼎器車未若青芊赤穰可載而輸龍枝
之委蛇可以軼黃暉鳳冠之旖旎可以謝文羽離離兮
雙儷何用嘉禾之並蒂油油兮參起何湏奇木之連理
使竟畝皆然兮豈啻千倉與萬箱將普天同兮又何羨
乎員嶠之粟雍丘之梁信兩儀之訢合兮萬靈叶而助
順毗忻忻其相告兮皇禔福而永命曰稼穡惟寶兮民
食惟天后知天而得寶兮周以長年越我皇之臨御兮
茲祥屢覲矧蕊甲之初旋兮重迎軒厯惟茲御廩之鍾

藏兮蓋簋簋普淖之自實穆清廟而奠明粢兮又縮鬯
蕭茅之所出庶徵以敘而來備兮肇我公田翠華翼其
至止兮省農以為天下先乃受命之溥將兮迄又降康
普厥明以率育兮誕告萬方皇謙讓而不有兮孰發其
祥爰諏日而祝冊兮享於明堂光九廟之玄靈兮擇我
烝嘗古矜盛於北里兮以登介丘周歸禾而作書兮對
揚王休臣稽首兮獻頌皇萬年兮以豫以遊

瑞麥賦

唐任 瑗

建極惟皇昭鑠於光出豫考卜乘時省方西自鄴鎬東
巡洛陽順天遊而有度協日晷之云長徵賢宣室布政
明堂風雨時序黎庶其康盡物稱瑞窮靈委祥明含日
月則階莫恒秀澤及草木而隴麥登芳於是闢離宮通
禁苑覩茲瑞之所應實皇恩之燭遠朝任得人時惟賢
相九流分職三旗協亮稱堯舜之允數同益贊而為唱
曰珍瑞麥生我皇國凌寒而秀彰聖之德願載東觀之
書以歌南薰之則既而帝曰欽哉天符聿來俾予光於

四表惟爾翼於中台念幽芳之遂性知棫樸之當材且夫麥之為瑞其德至矣居寒自生當暑薦美含實珠淨耀芒鋒起既標詠於詩人亦稱奇於縑史當其芄芄於野漸漸其秀將嗣穀以登年豈凌霜而不茂在昔唐叔嘉禾伊育昭彼周王天人斯穆今惟聖帝此焉攸淑涵之如春也及晝而繁榮就之如日也來牟而紛郁則有小儒怡然鼓腹照水鏡之光鑒參厯選之題目未登高而賦成庶陳美於金竹者也

瑞麥賦

唐高敬庭

聖人順動文思欽明天地貞觀品物咸亨去憑虛而就
安處面周浴而背咸京雲旗電發霜戟林行太陰用事
其日在斗萬國來庭百神奔走泉潛動而茲落水益壯
而冰厚冠異氣於繚垣吐嘉薈於寒藪不忌風雪全抽
兩穗逼日月之光華得雲雨之攸利芒纖纖而擢隴葉
青青而聳翠同黍谷之移暄類榆林之因地瑞紀增煥
嘉禾異植出天苑以稱奇訪人寰而未識凌玉霜而表

勁挺金莖而孤植顧擢穎於年和望生成於地力倬彼
藩翰其代天工即漢庭之相國類晉室之清通拜殊祥
而北首列圖史於南宮紆粹容於有穆冠鴻業而無窮
實穎實粟是崇是奉可以為瑚璉之姿可以為種稊之
種偉長至之馭序同少陽之在候成粒貴於鳥銜覆苗
期於雉雛夫瑞也百王之珍事其生也二儀之大德道
泰則稱物呈形政乖則羣力皆忒伊小草之何幸逢大
公之允塞願均照於離明祈作禎於王國

瑞麥賦

有序

明陸深

僕閒居田野多見瑞麥兩岐三岐至五六岐彼九岐者
得於傳聞殆未之見云實有之感茲休禎作賦一篇有
頌有美有風有刺義主勸戒附於古詩人之譎諫雖不
足以希蹤相如子雲庶東京之流亞也示我同志靡得
而布焉

天子正德五祀孟月維夏知知子瘍發下體更朔新愈
有客唁焉登堂三揖乃掀髯吐論曰夫物有異產事有

奇遭噉肉者不可與論味昧采者不可與即文闕哉希
乎今茲之所覩也子足良苦抑未之知乎知知子蹙然
而起危襟橫几奉客下風曰唯唯願客詔之客曰走故
農家五穀是理爰是弱齡勤厥四體今年逾知命而豐
穰凡幾一畝三石稂莠吐米皆未若今歲之為瑞也麥
苗芄芄穠岐為二揚芒含穎復為三四多者五六將將
覆地東鄰一莖九岐尤異殆淳和之所薰蒸而上帝用
以錫類也周書異畝漢歌兩岐陋昔人之誇詡昭后皇

之惠慈雖蒙白之翁負玄之老皆緣畝玩視相與嗟咨
若走者齒髮猶盛涉歷未廣宜乎驚悸而夥頤也知知
子仰屋太息索然久之曰否否客何談之盃也夫緣物
者貴質數文者適用且夫麒麟之希難以療饑芝菌之
祥難以充庖雲錦之爛難以禦寒蠙蚌之光難以續膏
是以聖明抑難得之貨壅不稽之言誠以重本而緩末
棄無益而即有用也客幸目覩岐麥津津稱瑞民瘼甚
矣果誰之致獨非客之所觀見者乎試為客語往歲已

已運厄元元夏耘被壟淫雨注天晝夕閱七颶風相牽
海波怒而山立江潮噴以駿奔蛟龍舞於街衢岡阜淪
為潏淵漂尸橫野浮畜蔽川千里一壑萬竈絕煙於是
百年之完聚連邑之生全化為魚鼈葬於鯨鱣者殆過
半矣暨乎水退民失故居滄桑一變形勝都非朱門沈
其閭閻碧瓦蕩為邱墟鳥窺巢而不下狐訪穴而重疑
號哭振野提負沿途父棄其子妻別其夫相與轉徙乞
丐奔逐投依若流星之逼曙而敗葉之辭枯也於是強

有力者牢朽材於古岸塞行潦以腐薪依濕林為棟幹
綴敗席為閭閻溷糞無別卧食不分什併為五棄仇講
鄰相依為命枵腹連旬野無留菜樹不遺根徼幸於萬
一苟活於旦昏爾乃積陰鬱結隆冬盛寒層冰千尺竹
柏枯乾豈祝融之故都為玄冥之停驂何曖曖之陽國
顧風烈於塞垣民無風具習不素安於是受凍而仆者
又如干矣天子方軫念南服融照閭閻發德音大王言
貸常賦關四門封簡書於芝檢勤使者於輜軒省大官

之供調減司寇之坐論賑倉廩之儲積蠲逋負之浩繁
方將奪民命於溝壑續生氣於遊魂蓋三五之罕有而
二氣所不能全之曠恩也良有司方憂經費之不足懼
考課之殿後鴻澤持而不下限令疾於電走朝四暮三
示一藏九使民破十家之產僅足以輸一家費數畝之
田未足以賦一畝笳鼓盈村擾及豚狗爾乃制為嚴刑
迨及黃耆巨木囊頭重金繫肘臂無完膚指欲墮手谿
壑之填未厭伸暴之門何有於是子遺之民瘡痍之末

斃於敲朴困於征科者蓋淪胥以盡漸不可久矣戾氣
醞釀蒸為疫癘方且乘陽發騰獷不可制今枕藉而病
卧者比比皆是招醫降巫若憤若醉是其凍餒蝕於胃
腸刑罰慘其心志發雙伏而並攻何方藥之能治厥禍
方萌殆未知其所至也使壟畝之植一本而十岐共蒂
而百穗將安救之而容誇以為瑞哉且菽粟所以貴於
珍鼎布縷所以加於玄黃者為其有用也今夫用者徒
存而用用者已亡是謂隆虛而病實忘遠而娛細矣僕

竊為客贅而不取也客聞而憮然曰噫嘻有是哉子之
迂也信乎執一者未足與權二泥彼者不可與適此子
徒鑒於已已之變為流而不止乎是殆滯於陰陽之迹
而未深於斯理者也且夫於穆之化圓運不已剝終必
復泰因於否吉凶互尋禍福相倚夫蟲之蠕蠕也不屈
不發地之隆隆也不伏不起數逆斯通氣順乃死是故
九載之水或以成堯七年之旱終以啓禹子豈知夫凶
儉之後繼之以豐稔登進之漸承之以君子邪然而氣

機橐籥必有攸始兆先於物發遠伊邇鐘鳴而隕霜礎
潤而降雨走誠得於俯仰之餘是以釋近憂而崇遠喜
也且夫麥備四氣實首五穀詩人頌其於皇下氓賴以
率育續歲功於發春函潛氣而多淑是休嘉之先露僊
斯理於將復示帝心之仁愛啓方來之祉福諒有開而
必繼孰無徵而迺獲走且與子託邱壑以優游咏皇風
之清穆是故有取於麥岐子何責之備而論之刻邪知
知子不能難客乃躡履而退曳杖而歌歌曰麥秀兮多

岐覆壘兮纍纍彼其之子曾是兮弗思於是知知子返
乎潛室沈思淵默緯情愔於渾淪抽端緒於開闢推玄
化之始終考休咎於遺冊覽春秋之所書測消長於三
易道有殊而歸同理既契而心戚然則客之言似亦未
為失也將以厥明戒館客循阡陌辨麥岐之疎數聽鄰
黨之損益問勤勩於三時弔疾苦於緩急於時風輕景
融煙朗霧清謝雕輿却繁纓被大練策溪藤導以童子
從以經生指三汀以東驚遵龍江而緩征瞻桑梓於原

熙拜松楸於佳城睇海氛於極際儼波浪之奔轟感釣
游之舊踪慨歲月之不停藹里墟之蔓延有孤物而屢
更亦浮雲之多態何難樹而易傾悵久寄於異土心戀
戀乎故京方徘徊以瞻眺寥彷徨而屏營顧見道左麥
穗岐岐本同末異旁無附枝始戟戟以競秀竟變變而
莫攜將神工之妙合復化鈞之巧持或雙昂以森矗或
左右以紛披或越畎而希挺亦共房而駢垂薄長颺以
洄洑照圓景而陸離等比翼於異類噉連理而不為固

物薄而稟厚騰衆喙以增奇胡哲人之超軼隨所如而
見疑昔宣尼之瑞魯匡人怪而圍之比干之忠殷曰不
祥而戮尸彼二聖且猶然般罹此又何辭抑軒輊之偶
致將彼蒼之有知於是歷覽既倦義馭未疲攬厥穎異
采掇以歸洵皇澤之滲漉拯黎民於阻饑託子墨以宣
祕聊洋洋以陳辭

握苗賦

以無助苗長時
至斯茂為韻

唐楊 濤

苗生有漸兮時不可踰握而求長兮是謂甚愚謂坐致

其滋茂翻立見其萎枯欲速之誠雖切受益之理固無計牽挽之功雖則勞止在播植之道不亦疎乎原夫勢惟探掇心則陵遽曾本固之靡思徒末大以生慮附麗無所同伐木而麗根援引靡辭似拔茅之連茹苟離根而去本必有損而無助然則抽軋奚補枯槁是招雖盡區區之意彌損芄芄之苗助長且乖於載績速成空望於一朝殊不足潤以膏澤託茲沃壤待天時以煦資地力以養諒物生之有恒何力拔而能長豈不以立心有

惑措手無疑俄見宛其死矣猶云有以助之不發悟於
盡瘁空深迷於務滋謂短長皆由於己謂遲速不繫於
時勞而無功殄乃自致方握蘭而勢並比捭草而功異
增高之望莫從盡振之助爰至徇躁求之性始望如雲
乖馴致之方終貽委地逆其理而如是傷其物而由斯
欲益為謀冀有秋之彌疾過求生害嗟不日而已萎是
以君子明於休咎每因緣於根本不苟且於華茂推於
命俟於時無若宋人之大謬

握苗賦

以時貴順成非
由速致為韻

唐李程

瞻彼陂田新苗在地徒施助長之術且異發生之類望
斯箱之翼翼爰用心期貪彼黍之芄芄方將力致搖然
乃亂興每如抽自貽伊戚職汝之由忽分叢於步武俄
裂土於田疇勞焉無功焉用拔乎其萃動而愈出縱其
生也若浮既不得於和熟宜取傷於躁求相彼老農求
之欲速偃僂煩手扶疎自信相違於淺種不用其良
既自露於深根曷云能穀忘枯槁之如彼尚低徊而念

茲繞指尚疑於取苧勞身豈並於乘時攬一握之纖莖
始如陵草聳千科之細葉終異園葵孰云農事以妨但
取高而為貴無思去草之務有若拔茅之彙不從其道
雖矻矻以徒勞莫悟其由訝離離而增歎原夫秀而不
實愛欲其生覆東臯而厯亂交南畝以縱橫或長或短
稍因人而盡起靡瞻靡顧俄麗地以同傾與其違性而
早落豈若從宜而晚成時不爽於榮枯事可期於逆順
惟躬是瘁寧同於百卉具腓以若所為且異乎孤蓬自

振亦由行道者之仁義可依嘉上聖之知命戒中庸之
妄祈賦孟子之言聊將此喻窮宋人之理永鑒其非

減裂禾賦

以為功不至其
報則然為韻

唐陶洪

昔子罕之秉權有封人之問焉以為事不可以不敬物
不可以不虔於是陳曩日耕大田予之於禾也其情易
爾禾之於予也其狀悴然莫不報其素莫不答其先予
知其意遽變予志倍功於他時盡力於茲地然後萌而
密葉以翠契本心而罔違充所養而不匱故知生寡者

其功未既實稀者其心不至苟屹屹以自強何芄芄之
莫致是以人之從政士之飭躬僉黽勉而無極並陵兢
而靡窮未有不課而名立未有不勤而道融所謂君子
重其實貴其功以行之慎者比其盛以動之慢者譬其
不惟盛也著美而可觀惟不也售能而誰取信乎鹵莽
於庶績何異滅裂於南畝草旣在茲衆亦棄之雖有百
廛莫得就而獲雖有萬頃焉可俯而持哂之者宜夫莞
爾歎之者何莫淒其則知惡必由人善隨厥操徃無不

宜施無不報雖斯言之細微實所諷之玄奧足以將懲
躁競用戒澆漓勗萬代之攸習勵烝人之所為若然者
功以之成利憑而得實輔政之義理亦勸學之典則在
稼尚其如斯人乎曷不鑒之以隱惻

御定歷代賦彙卷七十

欽定四庫全書

御定歷代賦彙卷七十一

農桑

稼穡惟寶賦

宋

范仲淹

資時者稼穡務本者惟王顧民食而可貴為國寶而允
臧田疇播植之時豈慙種玉食廩豐登之際寧讓滿堂
稽彼前賢垂諸大雅謂養民而可取必重穀而無舍惟
農是務誠天下之本歟以寶為名表物中之貴者耒耜

無廢黍稷是崇每訓耕耘之績如敦追琢之功闢五土
之時披沙豈異載千箱之處照秉攸同蓋以順彼天時
美茲政本觀艱難而有獲稱瓌奇而何損年多膏澤連
城之價可期瑞有嘉禾希代之姿奚遠是知寶金璧者
見棄於聖人寶稼穡者克濟於生民得之則九年利用
闕之則百姓食貧多既如雲寧愧白虹之氣祈於元日
似求赤水之珍其或剖巨蚌以勞心攻他山而竭力在
寒暑則非民之服在饑饉則非民之食徒聞賈禍之辱

莫見作甘之德曷若我東作可嘉西成不忒既堅既好
亞父欲碎而何能如京如坻季子比多而莫得念茲在
茲百王不移此盈疇而是貴彼韞櫝而何為見三時之
有倫如分三品與四民之共給胡畏四知今國家崇后
稷之功廣神農之道既豐年以為瑞蓋惟穀而是寶故
能富庶之風告成穹昊

萬寶告成賦

明葉向高

我皇上躬神聖之至德撫豐融之休辰決天閭開地垠

釀化鬱其醇流嘉祥降而紛綸八方茹祉九扈肇春望
青壇之嶽立兮既徵祐於明禋迨甸人之告壤兮值萬
寶之咸陳爾其金風協候蓐收戒晨當乘兌而執矩見
斗杓之西循農勤望歲風美歌幽遵原隰兮夷猶邈帝
澤兮中止遐阡雲鬱邇陌黛收峻壤腴沃平野膏流興
有渰而混色兮繼於皇之來牟嘉穎萋萋以離合兮結
方阜於西疇其種則植穉種稂稊芟稻粱高黍油油下
稊穰穰農師莫籍其數田畯靡辨其方其實則兩岐六

穗合苞露房連莖異隴玉粒紫芒大田之所未誦后稷
之所未嘗紹厥明於往禩播大有於僻荒於是萬夫之
長百室之鄉協千耦循畛疆臺笠糾鋌艾將既合沓以
鱗次復比櫛而雲翔巍困積於中野兮何坻京之相望
也殷倉箱以絡繹兮云我稼之登場也亦有秉穗之滯
遺兮蕃不盡於蓋藏豈胼胝之弗念兮用歌詠乎時康
曰玄秬黃薺冬稌夏穡兮亦輝載乎縹緗况茲擢秀與
稠華兮兼畝棲乎餘糧信九穀之既登兮婦子寧止合

兆姓以騰歡兮曰帝錫汝粵先疇之初動兮清剛艱於
舉趾朱明未霑於霖霖兮嗟既愆乎耘耔帝用軫彼農
艱兮曰余心其如燬躬圭璧於蓀壇兮却鸞輿而步履
睽雲漢之焦勞兮軼遐躅於彼美皇穹矚帝之精誠兮
驅蟄龍使行雨旱魃倏而遠逝兮溘商羊之旋舞隱隆
碑礚以汎濫兮亘東臯與西潁伊黍苗之芄芃兮儼神
功之揚詡紛坎坎其擊鼓兮爰敬迓夫田祖豐亨有象
兮民力用普匪帝格天兮孰潤澤此下土帝謙讓而弗

處兮曰民勞之未綏彼三時之樹藝兮重以寒暑之其
咨爰自天以降康兮雨暘惟時奠蒸民於乃粒兮豈曰
余私薦馨香以答貺兮陳桂酒與椒醕埋蒼穀於后土
兮亦用賽乎神釐命太史而書有年兮徵似續於來茲

萬寶告成賦

明 趙用賢

維聖皇之臨極兮垂宏覆於四方念民食之惟寶兮祈
昊穹之降康猗精運而誠感兮肆受祐於我將迺嘉歲
之肇登兮編區種以呈祥自倉庚之鳴春兮農人力耒

於耘耔方雲鍾于四野兮錢鏹復集乎東菑
甘雷而不降兮呼號屏而嗟咨帝曰吾民其何辜兮惟朕德之
無以迎釐澄心謁款於天神兮屈萬乘而步履擗玉蕊
以為方兮揭瓊漿以為醴謂天視之自民兮詔羣牧交
修乎愷悌惟太清之鑒誠兮乃灑乎靈液之彌彌暨茲
大火亘於坤維兮素節扇乎迅商土膏既滋液於震霖
兮嘉生紛其繁昌將神明之樹藝兮抑方宿之垂芒迎
金風而薦實兮浥玉露以含芳赤橫鋪荼兮白苗垂穎

北里之柜兮如林瓊山之穗兮盈珍夫何隨侯明月錯
落於原疇兮懸黎結綠物乎間井茲固滲漉於鄭白之
沃兮抑選天行之亨也夫豈惟農夫之廢兮翳當宸之
所珍也輟炎劉之六穗兮跨蒼姬之異莖彼中年與會
稽之產兮曾何足以侔禎爾乃聯千耦以徂隰兮操鉏
父而獲之築場圃於中野兮納重糶而聚之取圉廛於
三百兮羌遺秉其載路子嫠婦其拾資兮懷聖世之多
祐維高廩之蓋藏兮譬櫛比而墉崇為清醪以冷醴兮

且息饗以報豐躋公堂而稱壽兮輸秸稈以給公彼倚
市而雜若兮寧與薦藁乎絜功天子既嘗之以雖兮乃
奉盛以告潔明馨薦兮惠苕薌合蒸兮蘭藉曰時不害
而民和兮茲用薦信乎瑶席嘉蒸民之既粒兮吾其陳
常於下國彼中唐之朱草兮暨春圃之華平雖皇王之
嘉瑞兮曾何佐於藜藿豈知農殖之華秀兮繫民命之
所生世含哺於穰歲兮固將錯陶象而解義繩帝且曰
茲百寶之盈兮自田家之作苦當糾竝以荼蓼兮曾不

避乎日午雖一粒吾詎忘今及高皇之涯武發陳陳以
振業兮皇基與天乎終古亂曰惟聖至仁撫萬邦兮一
德升聞格九光兮溫液灑溟地獻祥兮蓂莢收西陸繁百
昌兮神人胥慶樂且康兮惟聖萬壽祝無疆兮

萬寶告成賦

明王萱

夫惟朱明弭節長庚耀芒蓂莢收宣令金帝持綱涼風載
於四裔清露隕於高蒼肆蟋蟀之潛處紛鴻雁以南翔
雜墜葉兮騷屑澹微波兮渺茫予乃遡觀元化側覽四

荒寫荔服於湘渚傲巾車於柴桑投迹乎明農之野寓
目乎登稼之場維時百穀紛薏穡人奔走倉箱駢羅婦
子先後均萬井之色笑繫百室其相守善銍刈而藏之
書之國史乎曰大有有父老倚杖來前曰融融乎熙熙
乎此鄙人所為終年服力而旦暮告休也予適然曰噫
嘻爾父老殆湛於所樂而未睹所繇者也方今聖明撫
運宵旰惟憂罔敢即康民瘼孔求祝融專戒屏翳永適
揚晴氛於九衢將播虐於千疇爰居齊寢爰禱園丘百

寮祗慎六事殫修滯獄遽啓逋臣見收豈雲漢之為儷
庶桑林乎可侔帝閤垂睇乎天關巫咸歷閱乎神州豐
隆鏗訇砰礚以來下屏翳零靈滄渚而傍流轉旋雨暘
以洎有秋於是重穰聿興苕穎畢發螟螣罔侵堅好斯
茁九土用均三時靡奪共焦心於薙草之期而鼓枹於
肅霜之月若夫層霄咫尺王畿千里扶風西迴馮翊東
峙納秸納秬納粟納米載納之穗各惟遠邇用實簋簋
芳薌薦止縮酌言況已宅嘉旨臨卜莖之垂垂卑九種

之纚纚神明饗之謂嘉德罔違宜爾孫子也又若徹侯
朱印上公華轂思皇多士列辟羣牧錫圭瓚於恩綸資
服勤於公餽展原思之貞廣晏嬰之粟莫不仰被仁孝
俯修親睦卿大夫頌之謂豐年穰穰受天百祿也又若
邑屋鱗湊保聚萃綿遺秉滯穗甫田大田興吟度曲炊
雕割鮮絕吐隸之煩響悅親知之話言惠而好我樂以
永年庶人戴之謂粒我蒸民受祿於天也又若綠睛結
骨鑿齒貫胷脂轄望星操艦覘風奇琛異璧明珠大弓

居爾時日及於會同則見天子致孝寢廟修禮辟雖主
鬯攸虔黍稷是崇方且焚前殿之珍裘却西域之飛驄
異俗化之謂天子有道瑞以年豐也今子逍遙泰熙之
時沐浴聖明之德喜終歲之甫休忘九重之需澤其猶
康衢之民何有於帝力也父老投杖而謝曰微子之教
幾與草木共其榮瘁飲河海忘其本源矣遂相與奮袂
而歌曰世運啓兮聖王垂至仁兮萬方成穡事兮相將
歲復歲兮樂康

老圃賦

宋 洪咨夔

嗟余生之刺乖甘餽密而即疏痛虺隤其倦遊羸盤薄
乎閑居老既怯於山嶠窮莫備乎澤車坐玩相牛之經
閒鈔種樹之書五十步兮野園數百步兮破廬一禿翁
以自樂羣癡兒而共鉏水解寒祛霏開日舒濯濯我畦
瀏瀏我渠穉甲怒長鮮英蔚扶涉熟成趣驩然忘劬翁
放鉏顧兒而言曰汝亦知夫世有遇不遇之疏乎駕醵
施蓼蠹醢脩菹藟蒲羞鼈食苾薦魚芥醬且截葱渌且

胸烈有桂椒滑有董榆已多乎燧人庖義氏之初而況
織翠屠蘇殷紅氎氍淋漓觴聲轟轟鐘竽猩脣豹胎之
鼎素醢紫駝之廚始饒涎其趨新中便腹而厭餘於是
葷臊望風而引卻芳辛候色而應須擷翠苔於崑丘掇
瑤穎乎方壺蔗漿盛夏而凍合萍齏祁寒而煖敷行以
白玉奉之綠珠五侯鯖兮遜美天酥飴兮失腴此其遇
合不啻初識之機雲晚見之嚴徐也若乃巖壑棲遲竹
屋槿籬尊擅場於秋風空結鱸魚之思韭爭長於春雨

未辨黃粱之炊荻生而河豚上橙熟而蟹螯肥指雖動
而莫驗腹不負其幾希已而凌寒采薇近陽刈葵祛萱
堂背簷芹澗滑饒黃獨之雪苗筐白薤之露凝茗蘼蕪
以滌煩醪枸杞而補羸冷淘煮兮槐茁餽餽斫兮蘆滋
泣膏飴兮電突飫糞火兮蹲鴟酣糟紫薑之掌沐醯青
陳之絲雲蒸鴈粟之乳濤淘胡麻之糜輪囷鶩鴨之瓠
鬱屈龍蛇之芝婆娑熊蟠之菰盤髮蚪髯之落鱗孕子
兮梭魚鼈解裙兮樹雞竹競綳兮稚子厥初拳兮小兒

以至太華之藕黃河之茹婆羅之波稜大宛之苜蓿南
越之鹿角江東之專蹄與夫蜀之雞蘇龍鶴梔脯加皮
名器紛綸色光陸離性異溫涼氣分王褒茅擇加精調
而得宜香聞爽心味適解肴有舉按之接敬無輟釜之
見欺芬芬苾苾雜陳更進可以甦文園之渴療首陽之
饑彼其石芥老而愈勁苦笋少而已奇焯育拂士之風
菊抱幽人之姿回睨蔓菁隨地而易質薯蕷視人而變
形曾不滿乎一啗矧肯數乎惡莖邪蒿臭蒜而穢蕒然

是蔬也進不榮於珥貂鳴玉之齒退不豪乎灑削胃脯
之頤煙雲歆薄乎夜讀之吻風露簸蕩乎朝吟之脾與
齋盍其爭道食方丈乎何期其不遇可知已兒拱而前
其然豈然諸葛以姓行元修以字傳王穆得坡老而重
銀茄為涪翁而妍與其見賞於肉食之鄙孰若託名於
梓茹之賢蓋窮患矯名之不立而不患併日之食粥達
患宿學之不能行而不患一筋之萬錢苟道義之信飽
飯蔬食而樂焉翁捧腹一笑長歌振林皎白駒之東蜀

毋金玉兮爾音

水輪賦

以汲引之道成於運輪為韻

唐陳章

水能利物輪乃曲成升降滿農夫之用低徊隨匠氏之
程始崩騰以電散俄宛轉以風生雖破浪於川濬善行
無迹既幹流於波面終夜有聲觀夫斲木而為馮河而
引箭馳可得而滴瀝輻湊必循乎規準何先何後互興
而自契心期不疾不徐迭用而寧因手敏信勞機於出
沒惟與日而推移殊轆轤以致功就其深矣鄙桔槔之

煩力使自趨之轉轂諒由乎順動盈科每悅於柔隨遠望蹄涔詎有朱殷之色挹茲鱗起終無塗附之期作霖或自於斯干流濕更彰乎就燥回環潤乎嘉穀洊至踰於行潦鈎深致遠沿洄而可使在山積少之多灌輸而各由其道爾其揚清激濁吐故納新輾桃花之活活搖杏葉之鱗鱗一勺每勞於濡軌三材必賴於工人浴海上之朝光升如日御泛江中之夜影重似月輪常虛受以載沉表能圓於獨運低徊而涯岸非阻委曲而農桑

是訓惠可周於地利空霑負郭之田材足任於天津多
寄臨川之郡池陂無漉畎澮既潴用能務實勢欲凌虛
罄折而下隨處彼持盈而上善依於當浸稻之時寧非
沃壤映生蒲之處相類安車異矣哉俯此溝塍潤於原
隰成形必仰乎膏雨屈已且安於卑濕苟量遠大之功
庶無慙於甕汲

水車賦

宋 范仲淹

器以象制水以輪濟假一轂汲引之利為萬頃生成之

惠揚清激濁誠運轉而有時救患分災幸周旋於當世
有以見天假之年而王無罪歲者也當其東作云布西
成以期何密雲不雨兮若焚若灼而大田多稼兮如渴
如饑耒耜之功既至倉箱之望將危豈無陂池抱甕之
行曷濟亦有溝洫挈瓶之利胡為乃有智者樂水而起
予梓人治材而和汝謂一溉之可洽俾百兩之斯舉固
無傷於濡軌軋軋臨川初有認於埋輪翹翹在渚是車
也匪疾匪徐彼水也突如來如補畎畝之不足損谿壑

之有餘渤潏騰波忽若刺山之泉湧潺湲去浪漸如澄
江之練舒詎見瓶羸那慙綆短流洋洋兮乍若膏潤苗
欣欣兮初如律暖載脂載牽幾通鄭國之渠弗馳弗驅
自解成湯之旱動將勢旋發與機會既引重之象著亦
救焚之功大河水洗浼得我而不滯不凝原田每每用
我而無災無害仁常汲下智復鉤深於以見因民之利
於以見洗物之心若夫大禹之年應資治水必也高宗
之世亦命為霖至如賢人在輔德施周普五日一風十

金史四庫全書
卷七十一
日一雨則斯車也吾猶不取

野燎賦

有序

唐崔湜

先天二年十月僕客於郢山之胡氏胡氏之子體道之命與僕有忘年之厚焉常以暇日登高縱觀見火燎於野壯而偉之因謂僕曰吾讀文多矣未嘗見有賦於是者試為吾賦之僕時負譴觸物多興援毫斐然豈近聲律其詞曰

郢國東走楚藩南極江關蒼茫千里一色在季月之窮

會方短辰之驟匿霜皚皚而夜塗霰淅淅而朝逼百草
同死萬木皆枯瞻彼灌莽鞠為榛蕪葉煩拏而積蔓枝
擁腫而盤株既攘壑以擢阜亦累塍而冒塗及乎農聚
告畢澤虞縱燎遠靡不焚近無不燒灼地而山川卷色
炎天而日月頽照固玉石以俱銷何芝蘭之不漙豈害
物以利獲將順時而通教沃我公田之饒遂及我私之
效廬城之曲客遊者聞之訊之其足觀也乃命我賓僕
東吾征馬登於高岡一瞰平野是時牧童樵豎匍匐交

馳提燭秉炬斯焉取斯爾其難棘崇蘊縮茅始吹殘芳
朱執短炬猶羸或蠢蠕翁勃或宛延冶晶翳翳而莫
振力繚繚而可羈不利進而求退每違高而趨卑狀君
子之攝勇同哲人之守雌及乎旭日照爛晴風蕭索憑
燥鼓威倏忽而作光艷艷而傍翥氣瞳瞳而上薄翻紫
皸於半天迸紅星而四落驕爾電烈雄然雷奔泉汨颼
颼沙騰霧昏其始也杳然若六氣含象開混沌其少進
也赫焉若十日揚光登天門迫而察之既似乎驚鑿失

轂駭平原遠而望也又似乎列羽攢旗馳塞垣於是走
熾狂迂衝煙怒擊咆林吼叢欽谷歆壁或霍護以燐亂
乍轟鳴而搗拍颺如萬壑之岸崩拉若干巖之石圻經
雪窟而敲靄突冰凌而沸液棲禽失竄以驚啐伏獸迷
奔而隨蹶應接不既吁其可畏能使烈士賈勇懦夫增
氣開耳目之溷濁蕩胸襟之滯歆登農山之嶺既瑣瑣
焉觀廣陵之濤亦復何謂及乎炎盛亢極途窮勢摧赫
赫埽地滅成煙煨何倏興而忽歇何有往而不來無介

推之生氣見韓安之死灰僕乃愀然歎息而謂胡公曰
夫物忌太甚火亦如之得茲在茲失茲在茲徒觀其進
德并命策名逢時三階式踐六柄初持方望會於朝論
亦謀明乎帝思居則擊鐘陳鼎出則長戟幟旗咄嗟而
嚴霜夏落顧盼而腐草冬滋道路多望塵而拜朝廷以
轉目相期及乎過進受傷滿盈致缺或身辱名替或氣
墮心折或朝失卿相之權或暮為匹夫之列客稍引而
多去友雖求而已絕高門翳羅雀之叢曲池淪涸魚之

轍伊餒餒而不禁固炎炎而就滅聊假興於斯文庶投
鑒於來哲

耽犂子賦

明 練子寧

閩粵之區有生號耽犂者耕於寬閒之野而老於熙皞
之鄉以告松月居士曰吾拙於進取而惟犂鉏之是耽
安於蹇窮而惟稼穡之是務方吾犂之在手也茫乎其
無思熙乎其自怡不啻執圭秉璧之榮而運斤游刃之
適也夫是以取而自名子其為我賦之居士曰嘻子知

所以得遂夫耽輦者乎天生蒸民紛然有欲強則凌弱
衆則暴獨非神聖之首出孰克為之司牧藹德禮於春
生凜威刑於秋肅夫婦以別父子以屬彞倫是敦風俗
返樸夫故士得以遂其詩書商得以通其販鬻工得以
措其巧於方圓農得以盡其力於種稼昔者堯舜在上
皞皞熙熙康衢擊壤幼恬老嬉湯武革命應天順人漸
仁摩義頌聲以興洎戰國之爭雄遂下逮夫秦楚開阡
陌而廢井田窮干戈而瀆威武民生斯時何所控訴漢

祖大度文景無為光武明章世紹丕基藹黎民之醇厚
幾刑措於斯時魏晉以降五代分爭裂冠分冕羶穢相
仍偉唐室之開基繇太宗之神武感魏徵之仁義歎封
曩之莫覩曾未幾何藩鎮跋扈更歷五季民困常主及
乎宋室之興削平僭亂開文明之景運幾跨唐而軼漢
休養生息三百餘年彼番番之黃髮咸沒齒而無怨元
氏之衰羣雄奮起鹿逐鯨吞瓜分鼎峙哀蒼生之紛藉
轉溝壑而未已赫焉皇明如日之升櫓槍渙其冰釋鼉

魅匿而無形接統乎千歲受命於穆清偃武修文坐致
太平出斯民於塗炭化愁怨為歡聲是以四海之內無
一夫之不獲皆女織紉而男農耕向使世塗方難真人
未出於斯時也救死而恐不贍又何暇耽犂鉏而樂溝
洫自今知之服膺弗失雖耕田而鑿井皆詠歌夫帝力
貧窮相資患難相恤租必先公食必先粒耕必讓畔以
同歸乎吾皇之極於是耽犂生仰而謝俯而揖請書諸
紳服之無斁

桑賦

魏
繁欽

上似華蓋紫極比彤下象鳳闕萬桷一楹叢枝互出乃
錯乃并煜煜隆暑涼風自生微條纖繞隨風浮沉陽蜩
鳴其南枝寒蟬噪其北陰秋風忽其將來咸感節而悲
唼玩庇蔭之厚惠情眷眷而愛深

桑賦

晉
陸機

皇太子便坐蓋本將軍直廬也初世祖武皇帝為中壘
將軍植桑一株世更二代年漸三紀扶疎豈衍抑有瑰

異焉

夫何佳樹之洪麗超託居乎紫庭羅萬根以下洞矯千
條而上征豈民黎之能植乃世武之所營故其形瑰族
類體豔衆木黃中爽理滋榮煩緝綠葉興而盈尺崇條
蔓而層尋希太極以延峙映承明而廣臨華飛鵠之流
響想鳴鳥之遺音唯歷數之有紀恒依物以表德豈神
明之所相將我皇之先識誇百世而勿翦超長年以永
植

桑樹賦

有序

晉傅咸

世祖昔為中壘將軍於直廬種桑一株迄今三十餘年
其茂盛不衰皇太子入朝以此廬為便坐

伊茲樹之僥倖蒙生生之渥惠降皇躬以斯植遂弘茂
於盛世厥茂伊何其大連尋修柯遠揚洪條梢樛布繁
枝之沃若播密葉以垂陰陰華宇而作涼清隆暑之難
任以厥樹之巨偉登九日於朝陽且積小以高大生合抱
於毫芒猶帝道之將升亦累德以彌光湯躬禱於斯林

出獲雨而興商惟皇晉之基命爰於斯而發祥從皇儲
於斯館物無改於平生心惻切以興思思有感於聖明
步徬徨以周覽庶髣髴於儀形

桑樹賦

晉潘尼

從明儲以省膳憩便房以偃息觀茲樹之特瑋感先皇
之攸植蔚蕭森以四射邈洪榮而端直爾乃徘徊周覽
俯仰逍遙俛睨靈根上眺修條洞芳泉於九壤含溢露
於清霄倚增城之飛觀拂綺牕之疏寮下迢遞以極望

上扶疎而參差匪衆鳥之攸萃相凰鸞之羽儀理有微
而至顯道有隱而應期豈皇晉之禎瑞兆先見而啓茲
起尋抱於纖毫崇萬簣於始基

蠶賦

周荀卿

有物於此儻儻兮其狀屢化如神功被天下為萬世文
禮樂以成貴賤以分養老長幼待之焉而後存名號不
美與暴為鄰功立而身廢事成而家敗棄其耆老收其
後世人屬所利飛鳥所害臣愚而不識請占之五泰五

泰占之曰此夫身女好而頭馬首者與屢化而不壽者與善壯而拙老者與有父母而無牝牡者與冬伏而夏游食桑而吐絲前亂而後治夏生而惡暑喜溫而惡雨蛹以為母蛾以為父三俯三起事乃大已夫是之謂蠶理

蠶賦

晉楊泉

惟陰陽之產物氣陶化而播流物受氣而含生昏纏繇而自周伊夫蠶之為物功巨大而弘優成天子之袞冕

著皇后之盛服昭五色之玄黃作四時之單複是以皇
者貴此功焉使皇后命三宮之夫人又世婦之吉者親
桑於北宮二月初吉遂布令於天下百辟兆民使咸務
焉是以仲春之月吉日庚午既差我馬惟蠶之祖編使
童男作以童女溫室既調蠶母入處陳布浼種柔和得
所晞用清明浴用穀雨爰求柔桑切若細鏤起止得時
燥濕是俟逍遙偃仰進止自如仰以龍騰伏似虎趺員
身方腹列足雙俱昏明相推日時不居粵召役夫築室

於房於房伊何在庭之東東愛日景西望餘陽既酌以
酒又挹以漿壺餐在側脯修在旁我鄰我黨我助我康
於是乎蠶事畢矣大務時成閤紆卷薄灑掃宮庭蠶母
須飾從容自寧至於再宿三日乃開闔啓房是瞻是觀
方者四張員者紆盤縱者相屬橫者交連分薪柴而解
著繭絲互而相攀競以拏攫載笑載言情者悅而忘解
劣者勉以增勤是月也天子以太牢之禮獻繭於寢廟
皇后親繰三盆然後辨於夫人世婦至於百辟卿士下

及兆民咸趨縹事爾乃絲如凝膏其白伊雪以為衣裳
冠冕服飾禮神納賓各有分職以洽百禮罔不斯服夫
功也起於縣縣成於翼翼頌之難周論之罔極殷斯勤
斯如何勿憶

蠶賦

有序

唐
陸龜蒙

荀卿子有蠶賦楊泉亦為之皆言蠶有功於世不斥其
禍於民也余激而賦之極言其不可能無意乎詩人碩
鼠之刺於是乎在

古民之衣或羽或皮無得無喪其游熙熙藝麻緝纊官
初喜窺十奪四五民心乃離逮蠶之生繭厚絲美機杼
經緯龍鸞葩卉官涎益饒盡取後已嗚呼既泰而烹蠶
實病此伐桑滅蠶民不凍死

獻繭賦

以將以給宗
廟之服為韻

唐李君房

冠六宮六職者公桑而已矣既卒蠶於世婦乃奠繭於
天子稽諸祭典實可重考諸女工斯為美信率土而在
茲亦奉先而是以當其今布明堂時更青陽蠶事既卒

女工式臧然後衣禮服出棘牆奉茲珍繭盈彼懿筐累
累乎如將薦卵皎皎乎有類凝霜既依於后亦獻於王
所以申課績之勞止展威儀之孔將遂繅三盆修六服
或黼或黻或朱或綠期有事於王公庶無勞於杼軸侯
其偉而實足尚之享廟之容克備展敬之禮允釐斯蓋
夫人之畏慎王者之肅祗不然者賦有織紵之筐貢有
畎岱之絲海人奉冰蠶至止園客將絲緒來茲冠冕之
服可成祭祀之儀可輯可以重其珍美可以揚其褐襲

何必桑壇而世婦斯復繭館而夫人乃入俾來者既殫
恒日不暇給蓋欲輸於勤苦表我敬恭厚禮奉於先祖
躬勤勸乃農功使三宮之有序斯百代之攸崇是以獻
繭之道治國之要將取婉於三推明至誠於九廟

春蠶作繭賦

明 沈朝煥

皋塗之石于闐之陌西陵春令爰作爾宅或降於原蛾
飛五色有女微行取彼柔柔以飼以浴敷此繭鄉既命
繅於妃教亦幻迹於籠場蛹以為雌蠅以為雄二十七

日從老得紅儀候至之室窈溫護以似閨橫棲止之筠
岌差莪以山崇爾其斂吻罷饒固以中函營絲吐忽老
洩而緘戰玄黃於儵忽藏白賁於韜鈴其繚繞也如宓
妃之緝霧其鮮潔也若鮫人之杼冰周陸以網蔽第以
絳或疎或密一縱一橫機工墨色而讓巧文士素管而
遜精憑脣吻以默運不手足而自營若乃緝張類散質
素比雪纍纍果實之就樹霏霏琨琳之吐屑客妻獻如
甕之祥嶠仙締入火之頤蜘蛛腹果以無功螳螂頻臂

其若折匪空作花匪蟲入穴匪卵累殼匪巢架樾摘天
孫之雲章擅前民之明哲亂曰踟躕兮若蛸委蛻兮若
蟬譬彼化人以禪自縊內其身而身亡經綸以為世者
亦莫不然胡巧而拙其蟲而天入機出機爾何知焉聊
以益吾釣緡之嫋嫋而賁於丘園之蓂蓂

素絲賦

以真素持賢
功濟為韻

唐
張良器

羽雖白賁然而輕玉雖白堅然而貞未若素絲之為用
以轉化而為名匪剛克以居禮實柔立而有成其正也

可以如繩之直其順也可以繞指而縈故能紛以隨時
浩歛養素揮流水則轉增其妍染繪色則不吝其污動
必隨人寸無恒度其來也何所自園客而出茲厥賦也
何地由岱畎而貢之俯乎列井將稽幄氏之練實乎澤
器徒為墨子之悲信干旄之望美非庶士之可持不願
充嫠婦之緯不願託寒女之絲因美杼以成韻庶補袞
而為期代若好五采我則大白以受質代若厭羣居我
則衆縷以為匹非異俗而招累將矯世而撫實夫其公

孫奉駕長倩趨風贈以生芻之束勗以素絲之總蓋取
諸自微之著積小成功君無謂我微君無謂我細若綦
之可織則假手以成勞如裳之可縫則因緣而善繫功
無不給物無不濟彼服卉佩蘭衣荷帶蕙念牽絲之無
日傷考槃之失計今將侔潔白以修身詠羔羊而取婉
儻黃絹之可比希管蒯而無替

素絲賦

以貞素持質
積功為韻

唐喬潭

色之真者尚乎白質之細者珍乎絲真則貞而潔矣細

則積而多之故君子韜德是務清以自持將經綸以濟
物先組織以修詞惟絲之故不憊乎素組以飾馬言好
善而不忘純之在羊時退公之有度始也重蠶事終婦
功促季月候戾風爰求柔桑寧止於十畝既登分繭乃
布於三宮至若三盆既繰八月成績方勤水練爰去地
尺晝曝於日吸太陽之光華夜懸諸井濡厚載之靈液
於是典絲瞻臨恍氏引繹引之於手如皓鶴之飛承之
以筐若凝霜之積既而嬪婦化理經緯縱橫當軒兮姁

娜之織弄杼兮軋軋之聲映羅袖而增麗度金梭而轉
明每知白以自守亦含章而可貞夫以白能受采文匪
勝質故公孫戒於從微墨翟悲其患失青為轡兮非擬
朱為繩兮未匹珍蠶恥越鄉而來獨繭嗟自園而出唯
彼蚩蚩之喻無愧皎皎之實乃續曰絲之素兮貞且吉
人之質兮清且一若見用於當時寧七裏於終日

機賦

漢王逸

帝軒龍躍庶業是昌俯覃聖恩仰覽三光爰制布帛始

垂衣裳於是取衡山之孤桐南嶽之洪樟結靈根於磐
石託九層於巖傍性條暢以端直貫雲表而劉良儀鳳
晨鳴翔其上怪獸羣萃而陸梁於是乃命匠人潛江奮
驪踰五嶺越九岡斬伐剖析擬度短長勝復迴轉剋像
乾形大匡澹泊擬則川平光為日月蓋取昭明三軸列
布上法台星兩驥齊首儼若將征方圓綺錯微妙窮奇
蟲禽品獸物有其宜兔耳跼伏若安若危猛犬相守竄
身匿蹄高樓雙峙下臨清池遊魚銜餌灑潑其陂鹿盧

並起織繳俱垂一往一來匪勞匪疲於是莫春代謝朱
明達時蠶人告訖舍罷獻絲或黃或白蜜蠟凝脂纖纖
靜女經之絡之爾乃窈窕淑媛美色貞怡解鳴珮釋羅
衣披華幕登神機乘輕杼覽牀帷動搖多容俯仰生姿

織機賦

吳楊泉

伊百工之為伎莫機巧之最長似人君之列位象百官
之設張立匡郭之制度如城隅之圓方應萬機以布錯
實變態之有章是以孟秋之月首叙庶物工民呈材取

彼椅梓楨榦修枝名匠騁工美乎利器心暢體通膚合
理同規矩盡法因事作容好無不媚事無不供於是乎
女工就素絲輕貫綜紀簡姦清織女揚翠美乎如芒麗
姿妍雅動有令光足閑蹈舞手習檻匡節奏相應五聲
激揚濁者含宮清者應商和順成柔慷慨成剛屈伸舒
縮沈浮抑揚開以厭間闔以高梁進以懸魚退以俠疆
氣變相應陰感乎陽倮俛不及進卻頡頏事物之宜法
天之常既合利用得道之方

布賦

有序

明徐獻忠

邑人以布縷為業農忙之困藉以稍濟然其為生甚疲
苦非若他郡邑蠶繅桑苧之業力少利倍者可同語也
然天下所共衣被而詳其衷者甚寡於是核其事告諸
觀風者作布賦

客有至吳下邑覽織婦之布素歎卉物之流澤收島夷
之末計啓閨房之長息廼喟然而歎曰美哉布也是固
一匹可以愧盜心不得千金之償約者歟何齋者之逐

逐而拾者之輩輩也下邑之士曰羅紈繡文素綈錦綾
長裾交褱流景飛晶此居者之所揚輝而觀者之所凝
睇也子不是慕而慕諸貧民之業亦有說乎客曰布通
貴賤之物不擇溫涼而適其為製也疏陋縑繒密殊絹
縠有氍毹之毛毳齊縞素之潔白賤靡綺之浮華傷貝
錦之徒飾孺夫匹婦可濟其乏缺通都大邑與千乘之
富相埒豈虛言哉曰子何不傷其勞而徒羨其美不稽
其私而徒誇其會子亦欲聞其勞且病乎若乃鐵木相

軋手挽足壓且餒且拗出絮吐核張弓掛弦弦急聲噎
牽條絡車呶啞錯雜借光於膏繼夜於日心急忘寐力
疲歌發衾簟空寒漏水寂溢婦子喧聞老穉畢力客曰
若是勞乎曰未也嫠婦卷袖妖姬解珮含秋入機凝寒
弄杼流蘇綰綜一伏一起踏躡相次上下不已縷斷苦
接梭澀恐膩手習檻匡聲揚宮徵長夜淒然得尺望咫
寒雞喔喔解軸趨市方是時也母聞謗而不暇投杼妻
迎夫而帖然坐起客曰若是勞乎曰未也織婦抱凍龜

手不顧匹夫懷饑奔走長路持莽莽者以入市恐精麤
之不中數飾粉傅脂護持風露摩肩臂以授人騰口說
而售我思得金之如攫媚賈師以如父幸而入選如脫
重負坐守風簷平明返顧客曰若是勞乎曰未也婦辭
機而望遠子牽裳而慙饑先潔釜而待米旋汲水而候
炊語少待以相慰既久竚而始歸夫嬰嬰以捐涕云攘
攘者在途索子錢而不釋併布母以如飛夫狼攫虎瞰
肉寒骨解無一語之抗聲猶三嚙而稱怪握兩手以授

之拂空拳而吞歎雖卒歲之靡從完小信而不怠是豈
但一婦織而衣十人殆所謂一室肥而衆俱瘠者也客
曰若是病乎曰未也海上之民土薄水淺其惡易遘枵
腹者未知其稅駕鷄衣者徒羨夫長袖大廣儲豐積出
自農夫之耕一絲寸縷皆從匹婦之手然而繭絲告成
置蠶不問耕犁召豐於牛何有是固天下之同風惟江
南為叢鼓晦鍾之他稅從升塗泥之末路計斗是以手
不停機而終歲無衣窮年仡仡而不贍其口客曰何言

之過也滄海變遷化為陵陸禹土塗泥塵注淥淥未黍
芄芄滿家彌谷貧攜白墮富樹華屋婚媾靡靡徒侶簇
簇顧今日之江南殆海內之樂國雖有布縷之征亦豈
加於穀粟何徒抱杞人之憂損名都之望乎曰否否不
然恒歲之運水毀木饑消長相代前建後除陽九陰七
聽命皇祇今昔庚申火仇馮夷亢令爍金天漢飛灰槁
土沃焦赤地坼龜既葵藜之莫采亦木棉之變衰枝無
垂拔絮罕歲蕤傾筐脫負采掇支離寡夫擁腫哲婦鵠

夷里胥蹠躐督郵喧呶無尺寸之可縫况綱運之崔巍
匪凶歲之取盈抑國計之在茲當是時也雖使星婺獻
技火鼠脫鬣聲大夏之全產省公儀之百室偁陽不懸
於城雉匡廬借練於飛瀑亦何以應之客曰嗟哉下邑
之民若是病乎曰未也工以習勝巧自技生傷末路之
靡淫變素樸為華英始力作以助農終辭麗以耀名競
良工之巧思幻化國之神能於是飄絮若蓬刻縷若髡
積歲成匹累織敵絨廣倍乎東海之二尺表齊乎別渚

之五虹盤以團鳳繞以飛龍綴金章以錯緣變猩草之
鮮紅爛太霞之朝采奪景烏之晶瑩袷已浮乎龍水綃
何羨乎鮫宮蓋其技巧始於渡海之黃嫗彰聞出自戀
闕之鉅公忘萬家之膏腴邀一日之歡悰傳觀內近遂
入公宮一匹遂抵於千緡聯筐始達於重瞳民已窮而
益偪霜既結而冰從嗚呼嗟乎藟醬竹杖天馬蒲萄通
西國而開越舊窮異詭而馳臆胸啓皇武之遠略罪臣
騫之作俑朝權不思其暮落寒灰尚戀夫冬烘竟殘桃

之取戾何獻曝之耿衷方今聖主龍飛問民疾苦諸非
著令改不暖坐首蠲茲役卹我隕仆尚衣之絺繡有章
進御之浮靡不取免徭征之巨累思息肩而就卧雖紅
紗之網運尚存而貂璫之督課稍安客乃瞿然作而言
曰甚哉鄙人不知民之病苦若是也九月授衣猶以為
晚終歲作勞祁寒不免吾又何敢袖手以向人徒負暄
而思暖

御定歷代賦彙卷七十一